

19 MAY 2002

Mahathir-Lawatan/I

DR MAHATHIR AKAN MELAWAT JEPUN DAN KOREA SELATAN

KUALA LUMPUR, 19 Mei (Bernama) -- Perdana Menteri Datuk Seri Dr Mahathir Mohamad akan melakukan lawatan kerja dua hari ke Jepun mulai esok sebelum meneruskan kunjungan ke Korea Selatan pada Rabu.

Beliau akan menyampaikan ucap-tama pada Persidangan Antarabangsa Nikkei Kelapan mengenai "China -- A Challenge or an Opportunity for Asean?" (China -- Satu Cabaran atau satu Peluang bagi Asean?) di Tokyo.

Beliau juga dijadual mengadakan pertemuan dengan Perdana Menteri Jepun Junichiro Koizumi, Menteri Kewangan Masajuro Shiokawa dan Menteri Ekonomi, Perdagangan dan Perindustrian Takeo Hiranuma.

Dr Mahathir juga akan berada di Nagasaki menghadiri majlis menamakan kapal Perbadanan Perkapalan Antarabangsa Malaysia (MISC). Kapal itu akan dinamakan Puteri Intan Satu.

Menurut para pegawai Wisma Putra, ini pertama kali MISC, sebuah anak syarikat perbadanan minyak negara, Petronas, membeli sebuah kapal yang dibina khas untuk membawa gas asli cecair (LNG).

Menurut satu kenyataan Wisma Putra, lawatan rasmi dua hari Dr Mahathir Korea Selatan adalah atas jemputan Presiden Kim Dae-Jung.

Selain daripada meningkatkan hubungan dua hala, lawatan itu juga bertujuan membina hubungan rapat dan persefahaman antara kedua-dua pemimpin.

Dr Mahathir dan Kim dijangka mengadakan satu pertemuan untuk membincangkan isu dua hala, serantau dan antarabangsa yang ada kepentingan bersama, menurut kenyataan itu.

Ini akan diikuti dengan satu perjumpaan delegasi dan majlis menandatangani lima memorandum persefahaman.

Dr Mahathir juga akan berucap pada majlis jamuan tengah hari anjuran empat persatuan perniagaan utama Korea Selatan dan melakukan tinjauan ke Pusat Penyelidikan dan Pembangunan Hyundai Motor, Pelaburan Kimia LG dan Pusat Inisiatif Penyelidikan Teknologi Satelit.

Beliau akan diiringi Menteri Luar Datuk Seri Syed Hamid Albar, Menteri Perdagangan Antarabangsa dan Industri Datuk Seri Rafidah Aziz dan Menteri Tenaga, Komunikasi dan Multimedia Datuk Amar Leo Moggie, Menteri Besar Kedah Datuk Seri Syed Razak Syed Zain, para pegawai kanan kerajaan dan wakil media.

Ini merupakan lawatan ketiga Dr Mahathir ke Korea Selatan, yang terakhir pada 1990.

Malaysia merupakan pelabur terbesar di Korea Selatan di kalangan 10 negara anggota Asean dan merupakan rakan dagangannya yang ke-11 terbesar.

-- BERNAMA

HK SHO AZZ JK RON